


# فازم المرسي فازم المرسي يوم عدسات



89 M



شع



## بتغيركليومعدسات

شعر

حازم المرسى



### سلسلة شهرية تعنى بنشر إبداعات الشباب

# • هيئة التحرير • مدير التحرير التحرير السعيد المصرى سكرتير التحرير يونس شعبان

الأراء الواردة في هذا الكتاب لا تعبر بالضرورة عن توجه الهيئة بل تعبر عن رأى وتوجه المؤلف في المقام الأول.

حقوق النشر والطباعة محفوظة للهيئة العامة لقصور الثقافة.
 يحظر إعادة النشر أو النسخ أو الاقتباس بأية صورة إلا بإذن
 كتابى من الهيئة العامة لقصور الثقافة. أو بالإشارة إلى المصدر.

### سلسله کنابــه

تصدرها الهيئة العامة لقصور الثقافة

رئيس مجلس الإدارة مسعود شومان أمين عام النشر محمد أبوالمجد مدير عام النشر مدير عام النشر البتهال العسلي الإشراف الفني الإشراف الفني د. خالد سرور

- بتغير كل يوم عدسات
- حارْم المرسى
   الهيئة العامة لقصور الثقافة
   القاهرة 2014م
  - تصميم الغلاث:

أحمد الجنايتي

- ه تدفيق لغوى: ياسر المحمدي
  - رقم الإيداع، ١٦٤٩١/ ٢٠١٤
- - المراسلات؛

باسم / مدير التجرير على العنوان التالى ، 16 أشارع أمين سسامى - قسمسر السعيين القاهرة - رقم بريدى 156 ا ت ، 2794789 (داخلى 180)

الطباعة والتنفيذ ،
 شركة الأمل للطباعة والنشر
 ت ، 23904096

# بتغيركل يوم عدسات

### المحداء

لما يضوت..
ما لحلم شويه..
ما تندمش عليهم
لأن الغايب ما بيرجعش
والواد التايه من أهله..
عمره ما هيقابل بعد سنين..
أمه
ويبكى العمر الضايع من غيرها
النهايات فنيه
وأنا..

(حازم)

### شبهالعفاريت

عيل. بيلاعب نفسه على البركه ساعة قياله عامل فريقين. عامل فريقين. خلى الجن يقوم من نومه. ويلعبوا وياه وبنوا له مدرج عالى. ملان جماهير ملان جماهير تهتف باسمه أصله ما كانش في التشكيل..

فی بدایة الماتش لما العصر بیدن.. بیکشوا ویجروا بیحس بوحدته بیخاف یاخد کورته.. یاخد کورته..

لما بيلعبوا ماتشاتهم آخر الليل حاولوا يصحوه علشان يلعب وياهم خاف بيشدوه بيشدوه يلبد في هدوم أمه ويغرس راسه ف صدرها (حلفوا ......)..

لو جه تانى على البركه مش لاعبين ويًاه هيخلوه يتكعبل من رعبه بعدها بسنين. خطفوا بنت بيعشقها خلوها تشوفه شبه العفاريت.

### مزيكة بابالمترو

لما سهرت معاه... عرفت.. عرفت.. إن أنا لسه.. ماكتبتش بيت لجل اسكن فيه في الآخره

وكأنى بطل أفلامه ومزيكا تملى ترن ف ودنى مش عارف . . «الحب فوق هضبة الهرم «ولا «سواق الأتوبيس»

. . . . . . . .

ماشى يدخن فى الزحمه بيكلم نفسه فى باله ومش حاسس بالناس

اللى بيرمى على روحه يمين الفرقه وبيسأل عن إبنه هيعيش مع مين لا يضحى بعمره الفاضل.. من غيرها راجع طاير م الفرحه.. عشان أصحابه فيدوا لابوه الدم فيتقتل الفرحه في قلبه فبتتقتل الفرحه في قلبه لما بيلقى أبوه.. استغنى عن الدنيا بحالها البيت والورشه)

مش عارف..

صورت المشهد إمتى !!
ووقفت إزاى فى الكادر
وما خدتش بالى من كاميرات
بتقرّب قوى على وشى
وانا بابكى
وهوا إزاى ..
عايش فى المشهد
مع إنه بقى له سنين
مدفون !!

مترحل من سجن لسجن بيبص من الشباك السلك الضيق... على عصفور

وأنا.. بعد ما علقته في سقف الأوضه قعدت أبص على جسمه متشعلق عينيه زايغه لفوق رجله عريانه بتحلم تسندع الأرض وما بتطولهاش قبل ما أحس بذنبه وأئنب روحي أتسلخ جسمه المشنوق وطلع منه اتنين

وبدال ما ارتاح منه جاب واحد تاني غير ميت خياله.. وايح جاى فى الأوضه

فكرت..
اخلص م القطر..
بركوب المترو
محطات المترو بارده..
بتحسسنى..
إنى باقابل أشباح
عايشين تحت الأرض

نسیت أسأله کان هیصور شکلی إزای ؟ وأنا راجع سرحان وبادخن . . علی باب قطر .

### مراجيح

حسیت إنی خفیف ، ،
وکأن الجذمه بحدوه . ،
ورجلی بشخاشیخ
ورجلی بشخاشیخ
ونسیت إن أنا جارر حنطور
وف ضهری کرباج!

هوا دا عيب الدخان..
تتسبح حبه في بحر
وتغرق في ضلام
تتفرج مدهوش..
بجناين فيها سمك.. فراشات
والورد حجاره
وفي الآخر تنزل من مرجيحه
ناشف ريقك
على بال ما لقيت قرش
تتمرحج بيه

كل ما تتشقلب تاخد لفه كمان تتشقلب.. تتشقلب.. تتشقلب.. تتشقلب.. تتد.. تتد.. بيخاط صاحب المرجيحه.. ويشد فرامل خيالاتك تعلا وما تلفش تعلا ما تعلاش توطى وتنزل دايخ.. توطى وتنزل دايخ.. على صوت طرقعة البمب

«يس»..

بيرتلها الشيخ

و«ياسين».. ينشد

أنا الميتم . .

. تخاف على أبوك

تخاف على قرش بتلاقاه..

بطلوع الروح علشان تتمرجح

وتدوخ..

تتكرر ميت مره في ودنك

أنا المتيم..
بالبنت أم عيون برسيم
متكومه ورا طشت تين شوكى
سايل على شفايفها
بتحلم..
تتشعلق مره فى ضهرك على مرجيحه
وتلف معاك
وكل ما صاحب المرجيحه..
يفكر انه يشد فرامل أحلامكم
تخدف له قرش

وأدوق التين..
اللى يادوبك طايب
يلسعنى كرباج..
يا ولاد الكلب
نجّستوا مقام الشيخ
والشيخ متخبى ورا ستر أخضر
متعطر من بره
وملحوس من جوه
بدم عيال متطاهره

أنا المتيم.. بمرجيحه وببنت وتين شوكى وريحة أبويا

أنا الميت...
بسرج وحدوة رجلى وكرباج
وفرامل
محبوس فى سيجاره
وقرش باشوفه...
بطلوع الروح

### حلمنشاز

باقلق . .
من لحن نشازه
وباقوم م النوم مفزوع
أستنطق . .
حلم بلعته
وأطهر نفسى
من طين البركه
اتزحلقت في قلبه
وأرمى هدومي الداخليه
عشان يرقات السمك الميته جواهم . .
تنزل عنى

وأحلم
وأنا تحت الميه
إنى باصلى وأتوب
استمتاعك بالضعف..
واللا رجولتك..
لما تذل صلابة مبنى
يركع عكس اتجاهات قبلتك
المتصوبه لحدوده
ويلين
تسكن رغبة لاستسلام جواه
ف تأثر على صوته
وترخى اندفاعات الدم

فى قلب عروقه

واحلم..
إنى باصلى وأتوب.
باقضى نهار..
شمسه بتطلع فى المغرب
ونسيم صبحه..
بيتحول ريح مسموم
وأبدأ أفكر..
فى سيجارتى الأولى
أتمنيت إنها تقابلنى..
فى حلم

وتطرد شكله..

أبو لحن نشاز..

من كل دفاتر الوعى، وعدم الوعى

بس استغربت..

فى زحام القطر

ما اختارش إلا أنا

وكأنه عارف وشى..

وصلى فى محراب..

إحساسه بضعفه..

إحساسه بضعفه..

وحرك روح يرقات السمك

اللى شايلها..

فى ضهرى وماشى

وكأنه محاصرني.. في مكان . . ما اعرفش استنطق فیه وأرمى هدومي الداخليه وأتطهر وأندم بيحاول يزنقني.. في خانة إحساسي بذنب. لأطول فتره لما وصلنا محطتنا الزحمه والقطر اتطهر.. من عرق الناس . . المحشوره في قلبه استنانی . . وعزم بسيجاره.

## عصافيرالدخان

اللى إتعود يحلم. دايماً يتحقق حلمه وأهم ما فى الموضوع. وأهم ما فى الموضوع. إنه ف لحظة موته. بيحلم. ما يموتش ما يموتش ويتخلد فى الأحلام

لما باريح ضهرى.. على عيدان القطن الناشفه فوق السطح . . في آخر الليل باحلم.. إن الشبابيك السهرانه معايا.. شموع.. مليانه بنات بيعروا صدورهم القمره.. م ترمى عليهم ياسمين والقمره حوريه.. هربانه من تعاليم ربنا في الجنه بتستني تسيل بكارتها على سحابه

ف تنقط ع الأرض

لون الأبيض يختفى م الدنيا والشمس تنور وردى

طفل..
بیحلم بامه
وهی فی حضن ملان
شعر ودخان
صوابعه بتنقط شهد

حلمى بابويا واخويا ليلاتى بيخلينى أتلخبط أنا ميت . . ولا همه الاتنين . . عايشين .

#### نهایات فنیه

حبل غسيلنا..
وهدومى الداخليه..
بتنقط ميه
وجلاليبى المنشوره
ما هيش بيضه
لما يضيع م الحلم شويه
ما بازعلش عليهم
لإن الغايب..
ما بيرجعش
والواد التايه من أهله
عمره ما هيقابل بعد سنين..
آمه

ویبکی العمر الضایع...
من غیرها
نهایات فنیه..
وأنا...
عمری ما كمكت قصیده

خدام الجامع ... لاحظ إن شعرى الجديد ... أصفر لإنى ما بالبسشى هدوم داخليه تحت الجلاليب البيضه! لاحظ برضه.. إنى باسيب على باب الجامع.. شقة عيش بدال فردتى المسروقه اللى لحد دلوقت ما قولتش.. إن عيال الحته خدوها عشان يغيظونى عشان يغيظونى ويخلونى أحرم.. أصلى

ما حدش لاحظ أوضته العتمه مليانه فرد ودقيق

. . . . . . . . . . . . . . . . . . .

حبل غسیلنا..
وهدومی الداخلیه
بتنقط میّه
وأنا..
متعلق
من و دنی بمشبك.

## حلم أنتحقق

حلم اتحقق..
ما حلمتوش وأنا نايم
حلمناه مع بعض..
في آخر مره.
دلوقت..
معب على
أحس آهاتها..
وأنا بعيد
شايف كل دموعها..
شايف كل دموعها..
محبوسه في عينها..
محبوسه في عينها..
ساعتها بتتحرر..

قلب طفل..
استفرد بيه الخوف
ألم غادر..
بيدوس بعصايته على أوتارها
بتدق كمنجتها
لحن إتكرر..
وقت ما كنا بنتفارق

الحلم اللي إتحقق..
أنا وانتي ما كناش أبطاله
كان عن واحد تاني
دخل الجنه لوحده
قطف الورده..
وانت شاورتي عليه بصباعك
وحلفتي لي..
إن الدم النازف م الشجره
والقلب..
اللي هيعزف صولو ليلاتي
هيخلوه..
بالذنب

## مزيكا

إعلان في قناه رافعين صوابعهم يتشاهدوا.. على نعش

شبعت موت

# بعدالمزيكه

(۱) حلمه المرعب.. کلب.. بیجری وراه..

> وأنا حلمى.. كلب.. بيكتب إسمى هناك بيخبط.

على بابه

(٢)

وبصمت ... غمست صباعی.. فی حبر أسود.. وبصمت .

**(**Y)

أنا مش مشهور.. لدرجة إنى.. لما أبطل أدخن.. تخسر شركات الدخان لما احتاج لسيجاره.. في آخر الليل.. والدنيا.. نايمه وناسيه.. يجيبوا لي سجاير بس باحارب.. إنى أفضل عايش.. شراینی.. مصبوغه بالإسود

أفضل ماشى..
من غير ما تكعبلني
جنازير منصوبه
فى عرض الشارع
وأحس بنشوه..
أما اسمع غنوه قديمه..
كنت باموت فى حروفها
«فوق الشوك».

## سيناريوما كتبتوش

عيان..
بانفلونزا العزله
وبقى لى كتير..
ما قابلتش غير أصحابى..
اللى باشوفهم
فى الأحلام

لو ما معاكش فلوس.. ما معاكش ؟ تعالى وما يهمش لعبى ولما يفكها ربنا هتجيب لى وأديك بتجيب

سألتك عليك امبارح
سألت عليك أوراق
بتزعق لى لما باقرب ليها عليك
امبارح وأول
وأنا . .
متكتف في البرواز
متقطع على واد متعلق . .
بشوية عمر قضيتهم ويًاه
بيكلم في التليفون اللعبه . .
المتعلق ع الحيطه

وساكت ليه ؟؟ طبعا علشان التليفون اللي معايا مش انت اللي شاريه

ما تزعلش..
لما هترجع
وتجيب وياك تليفون بحجاره
يعنى حقيقى..
هكلمك الصبح..
قبل ما يصحوا
وطبعا..

#### حضره

الليل نجومه كلها ماتت . . لما انتى . . حليتى التوك ، والطوق والبدر كان بيبص م الشباك لما انتى . . لما انتى . . خليتى راحتك على جبينك خليتى راحتك على جبينك آخر حدود الحلم لو يمتد لحدود نغم عودك أنا كنت قولت إنى مُت وعشت فى الجنه

بتفكرى في مين...
وانتى مين
مين دخلك...
للدينة الأحلام

دى مدينه مهجوره إلا من الأموات إيه اللى خلّى الكون.. يشملنى في عَطْفه ورضيت السموات

الخيمه كانت في الفلا وحدها وأنا كنت مستنظر وحصاني .. وحصاني .. كان بيلاعب الفضه .. في شاطئ بلا أمواج في شاطئ بلا أمواج فجأه لقيت القمر .. واقع في أسر حرير واقع في أسر حرير وجبينه على قضبان نورها غلب نوره

یکفینی منك کده.. دا البحر متحیر ... بین مد موجه وجزر طار الفرس فی السما والخیمه فی لحظه مقت شویة رمل مقتمی النعمه ومنتهی النعمه

يا ليلة القدر ارحلى.. ع العاصى متحرهه لا ترفعى وشك.. ولا تشيلى الكف ولا تشيلى الكف لا حسن أموت مقتول من سكرة المنظر.

## بتغيركليرم عدسات

نفق امتد لحد الأوبرا..
وحلم امتد ليوم الدين
وبقيت صاحب بياع شاى..
كناس شعال فى محل..
ف ما بيكنسش
منايك بيوصينى..
أرن عليه لو جه تفتيش
مخبر..
مخبر..
ألمع له البانص بوشى
وبياعة مناديل حبتنى..
على جوزها..

اللى بيروح للتانين ويسيبها فبقيت باستمتع ... بألم نازف من أنتها . . وإحساس اتفجر

إوركسترا لسيمفونية عصف وكورال نايات.. ورا تخت شرقى

مشهد عادی جداً وأنا ماشی فی عز الحر فی میدان التحریر قررت أمشی فی النفق . . فی اللی ما بین . . «طلعت حرب» «طلعت حرب» و «عبد المنعم ریاض»

بنت..
بتبدر ودنى دعا
علشان أخد منديل
بيشد عينيا الألم اللى منقط..
من صوتها
باتكربس..
تتكسر نضارتى

يوووووه ...
ميت مره تقول لي:..
ما تخليش النضاره على مخدتك
إركنها في جنب!!
أو حطها في جراب واقفله
بدال ..
ما تغير كل يومين عدسات
هوا أنا بلبس نضاره
من إمتى ؟!

طراوة النفق..
المتغطى رخام
خلاتنى أتنفس
بعد ما كونت هاموت م الخنقه
وأنا ماشى فى بطن الأرض
الشمس..
اللي بتكوى الناس
اللي بتكوى الناس
وجدورنا..
كل شويه بتمتد لتحت
واحنا بنفرع فوق

خضتني بصته وملامح أنشف من ريقي وكُفه.. زی جوانتی اسفلت وسند على كتفي إيديه اللى أتقل من شنطه على كتفي التاني بطاقاتك ... المفروض إنى أخلى النضاره.. على الكومدينو وتحت دماغي بطاقتي لأنى لا يمكن أنسى النضاره بس بطاقتی تملّی أنساها

بأمد ايديا تحت مخدتى بالاقيها.. بالحمد ربنا.. بابلع ريقى بابلع ريقى واقوم.. أشرب ميه

باتأمل.. تذكرة طياره في إيدى هاطلع من بطن الأرض.. لسابع سما على طول واللا هتنقًل في السماوات؟

حوار داير بين.. مساح جزم.. راكن ضهره على حيط متلحوس وواحد عامل.. بيلمع له . . كان شكله مريب لما الإتنين لمحوني.. سكتوا لما وقفت .. بصوا لي خفت . . جریت هو النفق امتد لفين أنا باجرى بقى لى كتير وصوت خطوتهم جي ورايا.. والشنطه تقيله

#### مش هاستسلم لغباوة حلم

طيب. . ما أنا عارف إن أنا بحلم خايف ليه لله أخد نفسى بانزل شنطتى ع الأرض وأركن على حيط . . وألبس جلابيته . . وأحط الصندوق قدامى . . وأفضل أخبط . . . فلوسى الفكه عليه . . بفلوسى الفكه عليه .

#### بيفرق حواديت.ع الشجر العطشان

وعطشت

شربت م الوحده

أنا دلوقتى . . مش فرحان بالصمغ اللى مغطى فروعى والشوك النابت على ورقى مش عارف حاجه . . من دنيا عايشها . . غير ليل . . يفرض لونه على الكل يفرض لونه على الكل وما يفرقش ما بين الطين والرمل فى جدورى بتتونس بيه . . . و بتشرب من ألحانه

حلم ابتدا.. بإيدين مرعوشه.. وشفايف مسجونه.. وعينين.. مستنيه تحرر كل دموعها تروى الشجر.. اللي المطره.. بقى لها سنين نسياه فرسم الصمغ ... على فروعه خرايط... لبلاد أحلام وإتصاحب ورقه على الشوك وإتعلم يشرب.. ملح دموعنا.. على غايبين ما يجوش الغالين اللي سابونا من وحدتهم..

فی سراریر بیضه

واحنا جدورنا امتدت في الرمل لدحد محجر فيها ويسيبنا شويه نسامر ليل مفروضه الصحره عليه بيحن علينا ساعات.. من ألبوم صوره مد فارقنا ببسمة.. حد أخد بسمتنا وراح بحبة صمغ.. يدفوا فروعنا يدفوا فروعنا وشوك ع الورق الناشف

وريحة بن ودخان..
وقهوه لعبنا معاهم طاوله عليها
ما حدش فاز
من صفر لسته..
بكل الاتجاهات
من صبر لوحده..
في كل ما قلب يدق

م اللون الأبيض..
شفايف ماتت..
من كتر ما قطعت
في ورقنا الشوكي
في حواديتنا
اللي اخدناها..
معانا من الطين
من دم كراته الحمره..
انسحبت..
قمت سنان تمضغنا..
فمانلحقش نقول: الآه

للون الأسود..
اللى بيرمى علينا الأحلام
ويونسنا بحدوتة جدى
اللى ما شوفتش له ولا صوره
على حيط..
احتلته براويز..
لشيوخ الحضره
واللى بيعزمهم أبويا
فيتحول بيتنا لمولد

وأسأله:..
فين صورة أبوك ؟!
فيضحك ويقول لى:..
أنا أصلا ما قابلتوش
طب مين..
قال لى حدوتة امبارح..
وأخدنى فى حضنه..
ونفسه معسل
ونفسه معسل
وما يقوليش..
وما يقوليش..

فاحاول أدور..
واسأل اخويا..
عن صورة أبويا
اللى ما قاليش امبارح عن جدى
يحكى لى حدوتة رمل..
مصاحب ليل
بيفرق حواديت..
ع الشجر العطشان
فروعه..
وورقه بيطرح
شوك.

### بيقرقض ضوافره مالقلق

ما فيش ولا قطر بيشيلك ولا محطه. عليها اسمها بارز.. في لوحه رخام حفظت بلاطها بالواحده ولا حافظ.. أسامي المحبوسين في الأوضه لجل يوزعوا غربه.. ولا أسماء عساكر.. قاعده بتدخن

الحروف اتصلبت ع السور طول ما احنا فوق الوقت شايفينهم الما فلاشات الحقيقه تنطلق بنشوفها . . لكن ع الحيطان . . لكن ع الحيطان . . لما يعدى القطر . . فوق قضبان ضلوعنا . . فوق قضبان ضلوعنا . . نرتجف . . ونسكت الدمعه

ريحة المحطه هي هي.. والغربه.. بياعة ألم فوق الرصيف والدمعه تشبه للعساكر.. واللي بيبيعوا التذاكر واللي بيبيعوا التذاكر والجرايد كلها مستنظره

فاضل ثوانى ويترمى.. لرصيف مغفل يقلقه زنزانه تانيه من ألم.. ينزل وقضبانه فى إيديه والقطر بيهز الوجود يصرخ..

. . . . .

7

ئ.

#### بيولع له سيجاره.. من تحت قزاز اللمبه

برد.. وحزن اتلكفت خوف عشش على جدران الاوضه لمبه جاز..٠ بتبص بربع عينيها.. المفتوح الوارم من تحت قزاز موشوم بالإسود أبويا.. بيبص بربع عينيه . . الوارمه المفتوحه ويولع له سيجاره من تحت إزاز اللمبه ويدورً.. على منديل مبلول م القُله

ويحطه على العين التانيه

مش عارف.. إيه جاب المشهد ده قدامي مع إن الصوره.. اللي نويت أرسمها . . كانت في الصيف واخواتي بحالهم.. نسيوني.. ونايمين ع السطح بيولع من تحت قزازاللمبه سيجاره وعينيه.. بتبص على وتبرق فباغمض واعمل نايم م الدهشه

كل الحزن اتكشف..
صورته
بيحاول يقتل ألمه..
وخوف..
بيغطى عياله بتبغ
اتبخرت البصه..
وهو بيحبس إحساس النشوه
في قلب عروقه..

ويورثنى . . . الرمد . . . التدخين . .

مع إِن الصوره.. ماجتش في بالي.. طول ما هو عايش

نص سرقته.. من ريحة دخانه الليلي خلاني أتمرجح.. بين صورة . . «الإخلاص» و «العصر» وفكرني.. بكفي عرقان في إيديه وأنا رايح مدرستي.. لأول مره . . غرقان أحلام متعبيه في شنطه قماش.. على كتفي ويفكرني بأخر بصه.. و كيس من دمي متوصل له قبل ما يتشاهد . . ويموت.

# المدنور

- الإهـــداء
- شبه العفاريت
- مزيكة بـاب المترو ١١
- مراجيح
- حلم نـشـاز
- عصافير الدخان 35
- نهایات فنیه
- حــلم أتحــقق
– مزیکا
- بعد المزيكه
- سيناريو ما كتبتوش 53
- حيضره
<ul> <li>بتغیر کل یوم عدسات</li> </ul>
- مش هاستسلم لغباوة حلم مش هاستسلم
- بيفرق حواديت . ع الشجر العطشان
- بيقرقض ضوافره م القلق B3
- بيولع له سيجاره من تحت قزاز اللمبه

## صدر مؤخراً في سلسلة كثابة

16- بنت من ورق نهی محمود
17- أخبار الأيام الأخيرة ياسر المحمدى
السرّ محمد عبد المنعم الحناطي
<sup>9</sup> ا- الجميلة وفارس الرياحفكرى عمر
20- كان عمرى ستاشر ربيع محمد فهمى
ا2- التَّحَررُ منْ نُوبَات الغياب سامح سكرمة
22- دم لإضاءة الطابق الثاني أحمد عادل
23- النبــوءة أسامة لبيب
24- على دراجة شريف سمير
25- أراكسم في مرآة روحسي سماء فهمي
26- تلاوة في كتاب السامريمحمد مجدي
27 عَصَاى مَعى والكُونُ يهتزُ تَحْتى محمّد المصطفى
28- البنت اللي مليانة ديفوهاتريهام سعيد

بتغير كل يوم عدسات



حازم المرسي

29 알:

NA SO

استطاع الشاعر عبر قصائده أن يحلل مشاهد من بنية المجتمع المصرى ، وأن يغوص في أعماقه ليرصد لنا جملة من التفاصيل الدالية على التناقض الصارخ بين منظومة القيم السائدة والسلوك اليومي فالشاعر مهموم برصد التفاصيل الإنسانية وتحولات اليواقع ، وهو مناجعل القصائد رغم حداثتها على مستوى الشكل، وتخلصها من الإيقاع والموسيقي التقليدية ، فيان تدفق الصنور و التفاصيل وتفاصيل التفاصيل وتدفق النفس الشعرى كل هذا صنع موسيقى أخرى.

(حمدی سلیمان)

Bibliothera Mexamdrina 1237517

ملاق للقيان أحمد الجناوني وحة للقائة Marta Orlowska



لثمن: جنبهان